

- प्रदेश मांय आवता महीना व्हेवण वाळा नगरीय निकाय चुनाव री हलचल तेज व्ही-हाल ताई करीब 9 हजार पर्चा दाखिल करी ज्या।
- केन्द्र सरकार देश री सार्वजनिक परीक्षा व्यवस्था मांय सुधार सारू हितधारकां री राय मांगी।
- प्रधानमंत्री नरेन्द्र मोदी आकाशवाणी ऊँ हर महीना प्रसारित कर्या जावण वाळा मन की बात कार्यक्रम री 137वीं कड़ी मांय काल संवारे 11 बज्यां विचार बतावेला।
- केन्द्रीय युवा कार्यक्रम अर खेल मंत्री मनसुख मांडविया जनता ऊँ खेलां ने रोजीना री जिन्दगी रो हिस्सो बणावण री अरज कीनी।

000

प्रदेश मांय आवता महीना व्हेवण वाळा नगरीय निकाय चुनाव सारू पर्चा दाखिल करण रा काम रा तीजा दिन आज 7 हजार ऊँ बत्ता उम्मीदवार ने 7 हजार 858 नामपाना दाखिल कीना। राज्य निर्वाचन आयोग रे मुजब 309 स्थानीय निकायां रा कुल 10 हजार 245 वार्ड सारू हाल ताई 8 हजार 995 पर्चा दाखिल कर दिया ज्या है। नामपाना दाखिल करण री आखिरी तारीख 31 अगस्त है, हालांकि काल दीतवार ने पर्चा दाखिल नी कर्या जा सकेला। नामपाना 3 सितम्बर ताई पाछा लिया जा सकेला। ई बीच आज नाम निर्देशन पत्र दाखिल करण सारू मोटी तादाद मांय उम्मीदवार रिटर्निंग ऑफिसर रा दफ्तरां मांय पूग्या। पर्चा दाखिल करण रा काम सागे ई उम्मीदवारां कानी ऊँ जन संपर्क रो काम ई जोर पकड़बा लाग्यो है। उम्मीदवार फिलहाल सोशल मीडिया रे जरिये प्रचार करता निजर आ रह्या है। खास सियासी पार्टियां भाजपा अर कांग्रेस सागे ई केई दावेदार निर्दलीय उम्मीदवार रा तौर ऊँ चुनाव मैदान मांय उतर रह्या है। केई ठौड़ां न्यारी- न्यारी सियासी पार्टियां रा अर निर्दलीय उम्मीदवार ई मुकाबला ने दिलचस्प बणा रह्या है। निकाय चुनाव मांय बत्ता ऊँ बत्ता मतदातावां री भागीदारी तैय करण सारू वोट देवण री जाग जगावण वाळा खास कार्यक्रम ई राख्या जा रह्या है। स्वीप सतरंगी सप्ताह रा तैत आज न्यारी-न्यारी ठौड़ां रैलियां निकाळ र बिना डर्यां मर्जी रा उम्मीदवार ने वोट देवण रो संदेश दियो ज्यो। बालोतरा जिला रा मोकलसर मांय विद्यार्थी वोट री आकृति बणा र मतदाता जागरुकता री अलख जगायी।

000

राजस्थान गर्वमेन्ट हैल्थ स्कीम-आरजीएचएस मांय साफगोई तैय करण सारू दावां री नियमित निगराणी अर कागजात रो सत्यापन कर्यो जा रह्यो है। चिकित्सा अर स्वास्थ्य विभाग री प्रमुख शासन सचिव गायत्री राठौड़ बतायो के आरजीएचएस रा तैत बेहतर ईलाज मुहैया करावण सागे ही रकम साफगोई सागे काम लेवणो तैय करण माथे सरकार रो खास ध्यान है। योजना रा तैत ए.आई. आधारित निगराणी अर कागजात रा सत्यापन ऊं शंका लायक पेटर्न री पिछाण करी जा रही है। वे बतायो के इण ई आधार ऊँ सीकर रा एसबी मित्तल मेमोरियल हार्ट अर क्रिटिकल केयर अस्पताल ने आरजीएचएस ऊँ निलंबित कर दियो ज्यो है। वठे ओ अस्पताल छोड़ चुक्या डॉक्टर रा नाम ऊँ रिकॉर्ड मांय हेरा-फेरी री शंका पाछे मामला री जांच करी जा रही है।

000

केन्द्र सरकार देश मांय सार्वजनिक परीक्षा व्यवस्था मांय सुधार सारू जनता री राय मांगी है। कार्मिक अर प्रशिक्षण विभाग रे मुजब ई सारू परीक्षा करावण अर परीक्षण तैयार करण वाळी संस्थावां, विषयां रा जाणकारां अर प्रौद्योगिकी पेशेवरां सागे ही आमजन अर सामाजिक संगठन 13 सितम्बर ताई राय भेज सके है। ध्यानजोग है के श्री नंदन नीलकेणी री सदरत वाळी टास्क फोर्स परीक्षावां मांय साफगोई, शिकायतां आगी करण अर हितधारकां सागे संवाद स्थापित करण समेत न्यारा-न्यारा उपाया माथे राय मांगी है।

000

राजस्थान हाई कोर्ट साइबर ठगी रा मामलां री जांच रे दौरान बैंक खातां ने मनमाना तरीका ऊँ फीज करण रा बारा मांय जांच एजेन्सियां अर बैंकां सारू विगतवार दिशा-निर्देश जारी कीना है। अदालत शंका वाळा लेन-देन अर टन्टा री रकम माथे रोक लगावण री बजाय संबंधित खाता खातां ऊँ लेन-देन बिलकुल बंद करण रा मामला मांय गाईड लाइन्स जारी कीनी है।

000

प्रधानमंत्री नरेन्द्र मोदी आज उज्बेकिस्तान अर किर्गीज गणराज्य रा दौरा सारू रवाना व्हया। ई मौके वे कह्यो के वां रा चार दिन रा ई दौरा ऊँ मध्य एशिया मांय भारत री रणनीतिक साझेदारियां मजबूत व्हेला। प्रधानमंत्री उज्बेकिस्तान रा राष्ट्रपति शफकत मिर्जियोयेफ सागे कारोबार, निवेश, डिजिटल संपर्क, रक्षा अर ऊर्जा हलका मांय मदद बधावण रा बारा मांय बातचीत करेला। ई बीच प्रधानमंत्री मोदी रा उज्बेकिस्तान दौरा ने ध्यान राखता थकां राजधानी ताशकंद मांय न्यारी-न्यारी ठौड़ां भारत रो तिरंगो झण्डो लहरातो निजर आ रह्यो है।

000

प्रधानमंत्री नरेन्द्र मोदी काल आकाशवाणी ऊँ प्रसारित कर्या जावण वाळा खास कार्यक्रम “मन की बात” मांय विचार बतावेला। आ हर महीना प्रसारित कर्या जावण वाळा ई कार्यक्रम री 137वीं कड़ी व्हेला। ओ कार्यक्रम आकाशवाणी अर दूरदर्शन रा सगळा चैनलां, आकाशवाणी समाचार री वेबसाइट अर न्यूज ऑन ए.आई.आर. मोबाइल ऐप माथे प्रसारित कर्यो जावेला। ई सागे ई एआईआर न्यूज, डीडी न्यूज, प्रधानमंत्री कार्यालय अर सूचना अर प्रसारण मंत्रालय रा यू-ट्यूब चैनलां माथे ई इण रो प्रसारण कर्यो जावेला।

000

अलवर जिला रा गोविंदगढ हलका मांय सिरमोर पुलिया कने दिल्ली मुम्बई एक्सप्रेस-वे माथे आज तड़के एक पिकअप अर ट्रक री टक्कर रे कारण तीन जणा री मौत व्हे गयी अर दो जणा जखमी व्हे ग्या। पिकअप मांय सवार नौजवान मौके ई दम तोड़ दीनो। दूजी कानी सीकर मांय आज तड़के बैटरी ऊँ चालण वाळी गाड़िया रा शोरूम मांय लाय लाग जावण रे कारण करीब 40 गाड़िया बळ गयी। पुलिस रे मुजब शॉर्ट सर्किट रे कारण लाय लागण रो अंदेशो है।

000

प्रदेश मांय चौमासा री बिरखा मंदी पड़बा सागे ई पारो ओजू चढ़बा लाग्यो है, जिण ऊँ घणखर ठौड़ां दिन री बगत तापमान 1 ऊँ 2 डिग्री सेल्सियस ताई चढ़ ग्यो। श्रीगंगानगर मांय लारला तीन-चार दिन ऊँ अधिकतम तापमान 40 डिग्री सेल्सियस रे आरे-सारे दर्ज कर्यो जा रह्यो है। लारला 24 घंटां मांय प्रदेश रा ऊगणी हलकां मांय कठे-कठे थोड़ी घणी बिरखा व्ही। मौसम विभाग रे मुजब 4 सितम्बर ऊँ राज्य रा ऊगणी हलकां मांय कठे-कठे छुटपुट बरसात व्हे सके है।

दूजी कानी जल संसाधन विभाग रे मुजब राज्य मांय हाल ताई सामान्य ऊँ करीब 17 फीसदी कम पाणी बरस्यो है। डीग अर फलौदी जिला मांय ई सामान्य ऊँ बत्तो मेह बरस्यो। अजमेर, अलवर, जोधपुर, चूरू अर सीकर समेत 20 जिलां मांय सामान्य बरसात व्ही। राजधानी जयपुर, कोटा, उदयपुर, भीलवाड़ा अर बांसवाड़ा समेत 19 जिला मांय सामान्य ऊँ कम बारिश व्ही। राज्य रा 693 छोटा-मोटा बंधां मांय ऊँ हाल ताई 437

थोड़ा-घणा भरया है जद के केवल 57 बंधा पूरा भर सकया है। प्रदेश रा बंधा मांय कुल बूता रो 57 फीसदी पाणी भर सकयो है, हालांकि लारला साल इण ई मियाद मांय 82 फीसदी ऊँ बत्तो पाणी भर गयो हो। ई बीचे राज्य मांय सैर-सपाटा री न्यारी-न्यारी ठौड़ा सैलाणी लगातार पूग रहया है। उदयपुर अर सिरौही रा आबूराज मांय ई मोटी तादाद मांय सैलाणी पूग रहया है। म्हाणा सिरौही खबरनवीस बतायो के आबूराज रा सुहावणा मौसम मांय सैलाणी नक्खी झील अर गुरुशिखर समेत न्यारी-न्यारी ठौड़ा हरी-भरी वादियां रो मजो ले रहया है।

000

राष्ट्रीय खेल दिवस रे मौके आज आखा देश मांय न्यारा-न्यारा कार्यक्रम राख्यी ज्या। ई मौके नई दिल्ली रा मेजर ध्यानचंद नेशनल स्टेडियम मांय राख्यी ज्या खास कार्यक्रम मांय केन्द्रीय युवा कार्यक्रम अर खेल मंत्री मनसुख मांडविया अर केन्द्रीय कानून मंत्री अर्जुन राम मेघवाल ई शामिल व्हा। ई मौके मांडविया जनता ऊँ खेलां ने रोजमर्रा री जिन्दगी रो हिस्सो बणावण री अरज कीनी। खेल मंत्री मोट्यारां ने रोजीना कम ऊँ कम एक घंटो खेलां सारु देवण बाबत् कह्यो। कार्यक्रम मांय कानून मंत्री ई शरीर री हलचल रा महत्त्व माथे जोर दीनो। वे कह्यो के खेल शारीरिक तौर ऊँ फिट राखण सागे बिना तनाव जीवन मांय खास काम करे है।

000